

愚

齋

存

稟

愚齋存彙卷第十五目錄

奏疏十五

酌擬中國紅十字會試辦章程請 旨立案摺

請飭籌江鄂災區工振平糶當田三事摺

荒政治本片

熟籌交通墾牧片

飭回本任並幫辦幣制謝 恩摺

遵 旨覆查兩平鑛案情形及收回辦法摺

密覆開平鑛案片

再密覆開平鑛案片

愚齋存凍

卷十五

男阿正修

查覆開平鑛案片

思齋存彙卷第十五

奏疏十五

酌擬中國紅十字會試辦章程請旨立案摺

宣統元年十二月

月 商約大臣呂前電政大臣吳會奏

奏爲酌擬中國紅十字會試辦章程請

旨立案恭摺奏陳仰祈

聖鑒事竊^臣等前在上海創設萬國紅十字會業於光

緒三十三年六月十二日將辦理情形及善後持久事

宜具摺奏報並聲明擬在上海設立中國紅十字會購
置地畝建造醫院學堂以立基礎等因各在案並即飭

由原辦總董記名海關道沈敦和前四川川東道任錫汾直隸候補道施則敬任鳳苞等就上海萬國紅十字會餘款先行籌辦所有一切事宜仍責成該總董等一手經理並飭詳擬章程呈核去後茲據該總董沈敦和等酌擬試辦章程呈請酌核前來臣等查紅十字會發端於咸豐初年英國女士乃丁斂而因英法合縱攻俄之戰親至戰地醫傷救難同治初年瑞士等十二國推闡其旨議立公約十條就瑞士都城會盟易用瑞士國旗以白地紅十字爲會旗並綴於會員衣袖知照歐亞各國陸續入會光緒二十四五年間荷蘭國創立保和

公會推廣瑞士紅十字會水戰未備各款議立公約十
四條而瑞士原約遂爲陸戰專條至是水陸戰醫傷救
難之法始備在會各國遵守原約及推廣約仍均以白
地紅十字爲會旗會衣又各因其國俗按醫傷救難宗
旨各自訂立專章由會製備佩帶勳章與會旗會衣同
爲標識互相知照通行立案光緒二十九年日俄交戰
臣等在滬與該總董等經中外紳商推舉設法救援東
三省被難災民中外會議募款設立萬國紅十字會聯
合中西表明中立先就中國風氣將戰地被難人民設
法援救出險分別資遣留養戰後又復查戶給振辦法

廣東不彙 卷十五 二
係注重救難其醫傷則暫借戰地向有之英美等國醫院津貼經費購給藥餌醫治戰國及非戰國受傷兵民統計實在救護者計共四十六萬七千餘人沾漑

皇仁出水火而登衽席羣曉然於紅會之有此利益無不同深欽感而其時中國於荷蘭推廣約瑞士原約適均先後奉

旨批准入會又蒙

懿旨特發帑銀十萬兩飭令派員前赴東三省廣施振濟中外官紳更復仰體

德意迅募鉅款竭力贊助兩戰國紅十字會會員均能

和衷引導會員觀摩規制其將卒亦畧無扞格事已經
驗自可推行該總董等又與原辦西董隨時再三討論
陸戰原約水戰推廣約醫傷救難宗旨參酌萬國紅十
字會經驗諸端核議經五中立國權宜聯合在中國地
方創始承辦中國遂永有紅十字會主權亟應就此立
定中國紅十字會規模期於可久可大爲主惟是經費
爲難勉就萬國紅十字會自籌款內竭力設法撙節先
在上海徐家匯路購地一區計十一畝零以爲建造醫
院學堂會所之用其應備藥物器具並延聘教習招致
學生各項所需計非四五十萬金無從開辦適德醫寶

隆聯合德京諸醫組織醫會在滬創建同濟醫院德醫學堂其經費均已募集意在昌明醫學躋於極高等而止查日俄戰時紅十字會醫學羣推德國看護男婦爲優因與婉切商訂准由中國紅十字會遴選聰穎華童之粗通德文者分班送至該學堂附習第一年送一班十人第二年再送一班十人由會酌給津貼約計八年後陸續畢業仍令分班輪赴該醫院臨診以爲酬報實卽增長其見聞膽識先後入會辦事教習不患乏人由此轉相授受推暨尤多仍一面就已購基地趕緊繪圖填土建造醫院學堂及辦事等處爲將來推廣地步風

氣開而事有實際聞而興起者當不乏人愈推廣愈臻
美備庶以鞏中國紅十字會之初基卽以合萬國紅十
字會之全局惟萬國紅十字會經費通計收款項下共
銀六十四萬一千九百兩除支過銀五十二萬兩零暨
購買地基銀一萬六千四百兩零另造徵信詳冊報告
外現在餘款只十萬五千兩零揆之預計各費不敷甚
鉅查各國紅十字會均由其國家發帑官民合籌始克
成立中國旣設此會又值海軍新立陸軍已有成效之
時允宜及早規畫完備以垂永久但水戰則以醫船爲
重造船養船需款至鉅紅十字會豈易有此力量第當此庫

款奇絀之時不敢再籲

恩施惟念中國與友邦聯合成會得此基礎頗費艱難似宜設法保全俾無失墜若因款絀中止既恐貽笑外人而從前布置經營幾同拋棄亦殊可惜臣等再四籌商擬請仿照日本赤十字社辦法以釀貲之多寡爲會員之階級較爲輕便查日本該社初亦設於戰地戰役既訖永遠設立與臣等創辦情事正同其平時資金除由國家特賜外有社員之年釀金志士之助金及生自本社執行事業之特別收入金眾擎易舉良可仿效將來集有專款亦可藉茲挹注先造醫船以備與國水戰

之用並應特立會長以資董率而期久遠茲將該總董等就瑞士原約荷蘭推廣約醫傷救難宗旨酌擬試辦章程六條繕具清單恭呈

御覽擬請

飭下軍諮處海軍處陸軍部分別查核立案並由外務部分行出使各國大臣知照各國政府及瑞士公會荷蘭保和會俾期接洽惟會務頭緒繁多關係中外交涉可否

簡派大臣作爲會長以昭鄭重如蒙

俞允卽由會長督率該總董等妥爲籌辦並將辦事情

形隨時報部查核以期覈實所有酌擬中國紅十字會
試辦章程臣等往返函商意見相同是否有當伏候
聖裁謹合詞恭摺具陳再此摺係臣海寰主稿合併聲
明伏乞

皇上聖鑒訓示謹

奏

謹將酌擬中國紅十字會試辦章程六條繕具清單恭
呈

御覽

計開

一上海爲通商總埠中外交通便利前經中西總董創辦萬國紅十字會現仍於上海徐家匯路設立中國紅十字總會醫院學堂附設事務所應由中國總董仿照日本赤十字社酌擬規則呈候會長核議施行並妥定集資入會章程以垂永久

二從前萬國紅十字會由中西總董會議刊刻中西合

暨圖記鈐用信守現創設中國紅十字會擬請

旨飭部鑄造中國紅十字會關防一顆頒由會長執掌
印用以昭憑信

三本會按照原約製用白地紅十字旗在會人員衣袖
各綴白地紅十字以爲標識外又參酌日本等國會章
製備雙龍嵌十字勳章第一等金質第二等銀質第三
等銅質均配用相稱色帶擬定字樣並給發勳章憑照
章程呈請會長核明請

旨敕部核定飭會製備通行以上會旗會衣勳章非在
會人員不得濫用違者究治

四上海徐家匯路總會設立醫院定章施醫又設學堂
定額招考華童教習醫學均由總董釐訂經理專章呈
請會長核示報告於眾認可施行一面另選略曉德文
聰穎華童每班十人先以兩班分年送入上海德醫學
堂肄業八年畢業得有高等文憑回會由總董分派辦
事仍輪派至德醫院臨診以增長見聞膽識並由總董
分向各省各埠展設分會力祛鴛名弊混以盡認真核
實之主義

五本會謹守瑞士原約十條荷蘭推廣約十四條醫傷
救難宗旨參酌萬國紅十字會暫行簡明章程日本赤

十字社章程因時因地以制其宜醫車由總會陸續仿製備用醫船與戰地醫院臨時商酌設法實行藉節糜費其常年會集報告一切辦法暫照現下通行新章辦理

六以上係現在組織大綱各項支件中國自相往來均用華文有關交涉者配用英文仍以華文爲準組織完備後應否改良或原約推廣約有所增刪及一切未盡事宜隨後由總董稟商會長妥酌辦理

請飭籌江鄂災區工撫平糶當田三事摺

宣統二年三月

奏爲江鄂災區民飢糧貴請

飭籌工撫平糶當田三事以輔蠲振之不足而蘇民困
恭摺仰祈

聖鑒事竊查中國幅員之廣東南常苦潦西北常苦旱
雨暘稍有不時卽成災歉

朝廷截漕發帑莫不立沛恩施督撫地方官議振議蠲
不遺餘力無如沿江數省戶口日繁食衆生寡去秋雨
水較多今年春花又恐損壞斗米千錢不必待至沈災
而飢黎拆屋賣田地妻鬻子已有民不聊生之歎城鄉

素有所蓄今則家無擔石之儲四鄰向可移粟今則動
遭遏糴之禁民以食爲天一朝飢餓善長者坐斃不逞
者卽爲亡命之徒

國家頒賜帑項自五六萬以至一二十萬例由督撫發
交州縣由州縣發交董保極貧次貧按口勻給多則百
錢少則數十錢臣前官直東兩省親赴鄉村督查戶口

方知官振例須合境普需因濫轉漏遂卽創爲義振專
放極貧救人救澈自光緒三四年山西及河間旱荒辦
起垂三十餘年矣邇來辦振舊人曰就凋謝各省財力
亦更困難竟至無可勸捐慈善團體愈久愈竭臣深慮

四海之大不能保無天災而義振徒負虛名後來貽誤匪淺因查東西諸國財政俱列罹災救助之法大都因地制宜得徵收地方稅州縣稅之附加稅一百分內之數分各歸各地方存儲生息又有中央儲蓄金以濟非常荒歉匡其不逮行政專家尤主地方優於中央之說以其調查精確救濟迅速財不虛糜民受實惠也中國向來常平義倉積穀出陳易新章程何嘗不善所惜官紳未能一律認真辦理或有名無實或藉端動用自宜新舊法參酌互用提前趕辦毋使因循擬請

飭下憲政館度支部民政部及各省督撫與諮議局預

籌辦理以備不虞卽如目下湖北沔陽等屬江蘇海州等屬雖經該省總督籌款辦振據各員董函電告災尙難全活去年調任湖廣督臣陳夔龍奏明電商臣於東南各省募捐接濟並派義紳相助又經楊文鼎在護督任內再四籌商經臣轉託奉天官銀號道員周克昌錦新營口道周長齡署天津道洪恩廣等分頭採購高粱玉米三萬大石又赴温州石浦採購薯乾上海採購麵粉交明鄂督派員減價平糶又經兩江督臣張人駿准海州紳士所請由甯滬兩處籌借官商各款援照前督臣端方任內桃源縣當田辦法向來荒年貧民命在呼

吸而家無長物可變多以耕牛地畝賤值求售鄉間大
戶爲富不仁乘機兼并及至豐年而貧者已無田可耕
矣痛心疾首莫此爲甚是以荒年設局籌款常田定其
限制減其利息一經歲稔無不歸贖湖廣督臣瑞澂在
滬就醫臣卽告以當田章程惠而不費曾著成效該督
允俟到任後再與司局商辦近日瑞澂來電災區乏食
已另購西貢米接濟錦州高粱仍屬派洪恩廣續購專
作籽種又江蘇撫臣寶棻函商亦以金壇溧陽宜興荆
溪丹徒等屬災情較重春振平糶正在需米除截留漕
糧外察看情形本省及鄰省之米未必能敷民食擬招

商免稅赴暹羅購米接濟等語當卽電詢香港西貢等處復電每石一百五十斤運滬需銀五兩數錢該處素稱產米之區諒因廣東及日本往購價亦漸昂皖贛米價略平無如各存畛域之見聞已不容多往購運或亦有鑒於湘省恐米出境民多藉口蓋天時有常變地利有豐歉全賴人事以補綴之乃至是而補綴之法將窮誠恐青黃不接各處米價有增無減貧民度日維艱輒易滋生事端雖不難隨時撲滅而傷人糜費已多甚至釀成交涉臣竊憂之前年陳夔龍撫蘇借撥庫款數十萬兩派道員曾鈞採購洋米轆轤接濟以安人心目下

災歉之區官振未能全放平糶萬難再緩上海各埠年來商務疲敝不堪干呼不能一應若非援案官爲籌墊仍恐不能趕緊辦理現幸督撫諸臣已奉

電旨思患預防通盤籌畫諒必能墊借鉅項廣購米糧並分籌的款以彌虧耗抑臣更有請者地方如有應濬

之河渠乘此歉歲正可借資民力光緒十六七年臣任

登萊青道時曾分年勸捐銀七十萬兩開濬小清河由濟南府直達壽光縣計程四百里河寬十丈連馬道三十丈筐土築隄裁灣取直導水入海於是兩岸荒田一

變而爲膏腴且使積潦有尾閭可洩不致十年九荒至

今青州士庶猶能稱之藉非乘其飢饉樂於趨工計必需款三倍方能收其功效現聞湖北沿江及襄河隄岸時常潰決必須統籌修導卽江蘇徐淮海一帶連年水災半由河道阻塞爲患苟能設法籌款及時疏濬亦必事半功倍惟自來以工代振專用壯丁其老弱婦女疾廢仍不能無賴乎振但有工之處自必易於振撫耳昔人云救荒無善策臣愚以爲非無善策也要在當事者平時勿畏艱難肯爲地方多謀生計臨事放開手段須知民食難緩須臾臣昔爲監司時常親歷災區故於流民慘狀目睹甚於耳聞伏念

朝廷飢渴爲懷時厯一夫不獲之慮用敢就目前情形略陳愚悃應請

飭下該督撫臣隨時酌量擇要施行是否有當伏乞

皇上聖鑒訓示謹

奏 四月初 日奉

硃批會議政務處知道片二件併發欽此

荒政治本片

宣統二年三月

再荒政無非治標之策而治本要在興農大學言生眾
食寡爲疾用舒則財恆足又曰有人有土有土有財可
見財生於土者始爲真財苟盡吾術以取之於民而不
爲民籌如何應吾所取民之財必先匱國之財亦終必
與之俱匱

朝廷有鑒於此特設農工商專部以農爲首夫農非僅
言稼穡播種也凡人有資乎土者皆可謂之農必使普
天之下無棄地則四民莫不自食其力於是農之能事
以盡工則次之夫工非僅言奇技淫巧也凡物有資乎

愚齋存彙

卷十五

奏疏十五

三

思補樓藏版

人者皆可謂之工或用手藝或用汽機如取諸桑而因絲成帛取諸棉而因紗成布取諸鑛冶而因鐵成鋼取諸森林而因木成材舉凡土產生貨一經製造皆成熟貨於是工之能事以盡商又次之夫商非僅言域內交易也凡生貨皆出於我之農熟貨皆成於我之工乃付坐賈以抵制外貨之侵越乃付行商以供給外人之取求於是國中之財以孳乳而寢多國外之財亦以吸收而漸集天下之大雖有凶年歉歲而無曠土亦無游民何慮之有故通商惠工之政策莫先於重農而懋遷居肆之樞機尤資乎足食應請

飭下各省督撫臣詳查轄境所有未經開墾之地不論
高低平陂皆當就其地質之所宜辦別土性疏通水利
設法招徠推廣種植而緩其一切賦稅如地方官紳有
能成熟地畝若干加增出產貨物若干准其報明度支
部農工商部覆查屬實卽奏明按照異常勞績優予拔
擢庶幾人人皆知務農處處皆無隙地積少成多既庶
且富而長治久安之道在是矣臣爲荒政兼籌治本起
見是否有當理合附陳伏乞

聖鑒訓示謹

奏 四月初 日奉

硃批覽

熟籌交通墾收片

宣統二年三月

再鐵路交通關係荒政甚大自京漢路成豫省土貨興旺其大宗爲黃豆芝蔴車運漢口後皆由輪船徑運出洋臣任內釐定養路修路之費較省於京奉遞年貨客加增所收盈利已兩三倍若使當日粵漢一氣呵成所贏更何止倍蓰距還本之期亦不遠矣庚子之後賠款一大漏卮惟賴土貨所入略抵所出去年奉省黃豆及豆餅出洋值逾八千萬兩民大獲利惜我鐵路爲釐捐所困將此運費讓日本攫取居多遂使大連灣商埠將勝於營口矣現議築錦愛鐵路借資英美措施偉大非

僅爲殖利而設然使沿路不先認真開闢將來養路修路之費何出還本還利之款更將何求臣查該路延長二千數百里沿途半屬膏腴除礦林必須招商開辦外尤當移民墾種則高粱玉米不可勝食將來東南各省偶值災荒不必乞糴邇南徑可求糧錦愛因利而利收效必宏或謂南省民食不慣雜糧臣是以乘丙午年徐淮海荒歲本年荆漢成災派員先後購買高粱玉米每次數萬大石合內地斗斛逾十數萬石萬眾爭糴甘之如飴且多取作籽種故欲爲東南預籌一移粟之區莫如西北尤莫如錦愛鐵路之左右或謂該處耕作無人

則移民亦爲急務或謂閩廣人多傭於外洋屢爲美洲苛禁曷不移至東三省然恐寒燠相去太甚風土不能合宜臣二十年前在東海關任時曾力勸登萊青三屬人民渡往吉林墾牧聞至今愈去愈多順直民庶似亦相宜可否請

飭下東三省督撫

臣

直隸山東督撫

臣

認真籌度今日

移民以耕種卽爲實邊大計將來移粟以濟荒尤爲塞漏遠謀數年而後錦愛路工告成荒田亦皆爲沃壤矣一舉兩得時不可失事實當爲惟開墾必需鉅款現既統籌鐵路經費似當切實預算或卽在英美借款之內

多借若干專作墾荒之用蓋借債以備練兵雖爲自強
恐無把握借債以營實業果能興利必有取贏是在筭
地方財政者權衡緩急輕重之間固不必因噎廢食也
臣爲熟籌交通墾牧兩利兼謀起見冒昧縷晰附陳伏
乞

聖鑒訓示謹

奏 四月初 日奉

硃批覽

飭回本任並幫辦幣制謝

恩摺

宣統二年七月

奏爲恭謝

天恩仰祈

聖鑒事竊

臣

於本月十三日欽奉

上諭盛宣懷著赴郵傳部右侍郎任並幫辦度支部幣制事宜欽此聞

命之下莫名惶悚伏念

臣

於光緒三十四年二月初七

日欽承

恩簡補授郵傳部右侍郎隨奉

命回滬會辦商約事宜數年以來涓埃未報茲蒙

飭赴本任並幫辦度支部幣制自慚樛昧兢惕彌深查郵部爲交通總匯之區路電輪船雖經臣籌創於始而近日情形鐵路尤關重要已成者養路修路處處皆須斟酌盡善未成者無論官辦商辦均屬萬不可緩至幣制係財政初基各國整頓利權無不從幣制入手現已奉

旨釐定規則自不難次第舉行第中國積習已深幅員過廣使民信用必須持定方鍼腳踏實地夫而後中央有操縱之權斯各省盡推行之利臣知識驚下深懼弗勝惟有力矢慎勤不辭勞怨隨時隨事凜遵

面諭秉承度支部尙書及與各堂官盡心商辦俾臻妥
善以期仰答

高厚鴻慈於萬一所有微臣感激下忱謹繕摺叩謝

天恩伏乞

皇上聖鑒謹

奏 本月十四日奉

硃批知道了欽此

愚齋存彙

卷十五

奏疏十五

六

思補樓藏版

遵 旨覆查開平礦案情形及收回辦法摺

宣統二年十二月度

支部尙書澤公會奏

奏爲遵

旨查明開平礦務一案始末情形及現擬收回辦法恭摺覆陳仰祈

聖鑒事宣統二年九月初八日承准軍機大臣字寄欽奉

上諭張翼奏開平礦案現與英人交涉漸次議結辦法出入關係甚巨將大概情形先行陳明請特派大員切實妥籌一摺著載澤盛宣懷按照所奏各節確切查明

據實具奏原摺著鈔給閱看欽此遵

旨寄信前來復於九月十六日二十四日十月初七日十一月初一日疊次欽奉

上諭并鈔交張翼原摺三件直隸京官劉若曾等原摺一件都察院代遞劉春霖等公呈一件資政院原摺一件九月十六日所奉

諭旨中并有誰是誰非務期水落石出之

明諭仰見

聖主於兼聽並觀之中仍寓執兩用中之意欽服莫名
臣等當卽咨行外務部及直隸總督調齊全案研究詳

情一面派員至秦王島唐山等處實行考察并隨時備
文咨查張翼現已調查明確始知開平一礦早可收回
延誤至今實屬失機失利惟事已至今日若謂副約效
力可不費一錢臣等實不敢信張翼一面之詞如謂收
回自辦宜不惜重資臣等亦不能不爲直省籌萬全之
計謹將查明直隸官紳與張翼爭執之處及現擬收回
辦法縷晰爲我

皇上陳之此案張翼所爭之處謂如援照辛丑年該員
與英公司所訂之副約則礦產卽可以收回不必如現
在直隸辦法之重煩巨款是說也臣等信其能行於天

津甫由聯軍交還我國之後及張翼赴英控告得直之時而不敢信其能行於今日何以言之開平礦務係光緒元年前北洋大臣李鴻章欽奉

先朝諭旨飭令創辦以應軍國要需派委候選道唐廷樞往復察勘擬具章程聲明官督商辦凡有興革均由李鴻章隨時

奏准而後施行是開平一局實爲完全官督商辦之局非由公家允准不能任其變遷乃於光緒二十六年北方拳亂之時該局督辦張翼總辦周學熙證見唐紹怡法拉士倉猝簽押給函與前稅務司德羅琳爲代理總

辦屬令保全礦產德瑾琳卽與英礦師胡華假立賣約
藉資保護而並未載及給與何等價值此卽非真賣之
確證二十七年正月張翼回津胡華以移交約逼令簽
字張翼不允德瑾琳謂移交約不過將開平礦務局產
案移交與開平礦務有限公司作爲中外合辦乃加立
副約以限制移交約同日簽印四月卽舉嚴復梁誠爲
華總辦與洋總辦會訂試辦章程十九條聲明行用以
十八個月爲期如有不妥再行更改在張翼當時意見
若非作爲中英合辦不能得英人保護之力又因該礦
本有洋商借款兵退之後卽便准其合股亦尙與礦務

章程不背故僅加立副約會訂合辦章程先令招洋股
十萬鎊爲一時權宜之計而於胡華所立之移交約無
實行之效力亦無取消之明文是年五月張翼具奏祇
稱唐山林西等處凡該局廠棧處所聯軍一律被佔不
得已加招洋股改爲中外合辦其向來稟定章程及應
完稅款均議定照舊辦理等語是其所訂副約移交約
張翼並未奏明國家無由知悉若於聯軍退出之時卽
由北洋大臣援照甲申法越之役招商局產業移交旗
昌洋行亦曾權註美冊事定仍復收回之例卽與英公
司交涉公論所在英政府未必遽能袒護亦尙無難收

回乃招商局可以收回而開平不能者因招商局係總辦馬建忠所訂賣約隨即不認另派大員廢約收回故順而易開平則張翼訂中外合辦之約雖罪其專擅而未卽派員廢約收回故逆而難迨至收回不成北洋大臣袁世凱以擅賣疆土奏參經奉

嚴旨將張翼革職張翼遂赴英控告得直光緒三十一年英公堂判詞有如副約所載各節不能於近情之期限内奉行勿違則本法堂當盡力而行將礦產及產業收回交與原告等語是英公司不能實行副約卽可將礦產收回英公堂已垂爲信讞當張翼未回國之先北

洋大臣袁世凱先派津海關道等與英商那森協議收
回未能辦到及張翼回國後英使薩道義函致侍郎唐
紹怡亟欲調停免再涉訟其節略內稱按副約意見礦
務局之操權應在天津所立合同應照華人礦務公司
爲底其章程一切張翼可以簽押須奉

御批方爲妥當俟得

御旨之後由外務部移知英國欽差現在開平礦務局
卽將所有之全業盡交中國礦務公司等語其時張翼
調往北洋又未與英人理論致此說終未見諸施行有
此數因事機已失以致該礦爲英公司占踞者十年華

股東因見督辦撤銷華部解散知華洋勢力不敵遂將股分紛紛出售因而有洋股多至八九成英公司獨占優勝之局因而有公積三十萬鎊之盈餘彼之憑藉已豐與張翼在英控告時情勢又迥不同即責以副約並未實行應仍照英公堂判詞辦理而境過情遷亦恐非一紙空文遂能令礦產全行歸我況現在張翼迭次奏陳之意仍是落到責英公司實行副約以爲他事卽做不到但能照副約華洋合辦亦已無傷不思從前華股實有三十七萬五千鎊其時尚不能實行合辦現在所存華股不過十之一二尙何合辦之可言且合辦而不

能收回亦恐非直省紳民所能樂從此張翼謂照副約收回可以一錢不費之說施之今日實未敢預必也至直隸官紳所爭之處謂此礦關係主權疆土若能收回自辦卽數千萬之巨資不宜吝惜況有該礦之蘊藏無盡足可取償決無損失斯言也臣等於收回自辦之說固無異辭若主權疆土之言該礦盈虧之數亦尙不能不加審察查直隸紳民所謂主權疆土係根據前北洋大臣袁世凱奏參張翼之言以秦王島口岸有開平公司地畝產業計一萬三千五百英畝一節爲最重查秦王島爲我自開口岸全屬我之主權斷非一外國商辦

公司所能侵損況英公司亦認爲中國自開商埠有三十年袁世凱奏案可憑且該公司所有該處之地畝馬頭現據_臣處委員查得開平局曾於光緒二十四五年間先後託清丈局在秦王島圈地四萬一千三百零九畝除去未買熟地未買民地官荒官買之地及沙坨河溝窪地實購得中國九千九百四十二畝七分六釐其泛言一萬三千五百英畝者或卽指最初所圈留之地而言此項田地現仍歸原業主耕種由該公司收租其地之紅契糧串悉存張翼處歷年錢糧亦由張翼完納並未移交張翼送來清摺言地契錢糧事亦同是祇須

此次將英公司轆轤理清之後即可於張翼處將地契取回尙不至有礙主權疆土其他承平建平永平等金銀礦開平公司或有代還官款或有附入股票現仍歸張翼派員經理契據均在口外各存各局尙有唐山洋灰廠開平亦有股分已劃歸周學熙華商獨辦開平公司並無理論其餘各處碼頭地畝移交約中謂詳載細單之內而單內所列皆未嘗正式移交此數層均無虞藉口至開平爲東亞著名佳礦人所共知辛丑年胡華之報告謂足供八十年之採取本年英公使照會外務部謂去年有二十四萬七千鎊之利息就此而論卽費

重價收回亦尙可收大利然臣等據上海招商局所稱
開平現在煤質每百分中有灰三十分該局已經少用
又據前開平美國律師林文得所遞說帖言開平自灤
礦既開之後地位甚險蓋因出煤過多利不抵費又有
各處煤礦互相競爭恐非從前可比是以華人議買英
人樂從等語是開平礦產雖旺經累年開採之後煤質
已差本礦銷場因之漸滯將來能否獲利如前亦無十
分把握此臣等所以於直紳主權疆土之言該礦盈虧
之數不能不慎思明辨者也惟此礦必須收回自辦確
有二故一則張翼所訂之副約移交約中國國家雖未

承認但英公司久占不還并將各處之地畝碼頭據爲
應有長此不問卽與承認此約何異一則灤州開煤費
款已多兩礦相離不遠售煤必致相爭開平若不收回
灤州亦受其敵張翼奏稱德瑾琳當日賣約旣係私訂
則今日但聲明廢約卽可收回何必備價旣未曾賣何
所謂贖不知英人占礦之後因華股售出獨力營辦亦
有所費舊債公積均可藉詞故議收回必須補償英人
所失皆爲理勢所必然惟收回之辦法臣等以爲一在
直隸須籌有的實之抵當一則直督須派員確查公司
之帳目抵當之法本年直隸督臣陳夔龍遣派洋員馬

尼爾等赴英向英外部解釋案情之時曾給與英公司條件兩項第一條件爲將來財產移交時中國國家發給該公司一百萬鎊國家擔保之債票長年七釐行息五年之後二十年之前贖回至該公司原有之債票或全數由中國國家還款或全數換給國家七釐債票均聽原票主自便第二條件爲中國國家接受有限公司之礦卽設立北洋官礦公司資本作爲二千萬兩每股十兩以一百萬股分給有限公司以一百萬股分給灤州公司至有限公司原有之債票或還款或換給北洋官礦公司之債票聽原票主自便此兩條件陳夔龍已

於本年八月奏摺內具陳並言密諭洋員注重第一條件辦法而當其正月二十三日將此條件給與洋員之時並未先行請

旨逮英使已據第一條件以相計較而外務部猶以債票由中國國家擔保欲得

朝廷允准恐有難處之語答復殆亦以其先未奏明之故而英使卽以此言電知英外部九月間北洋所派洋員由英來電曾述及之卽英使末次照會外務部猶以未得政府允准爲不滿意是國家擔保一層外務部亦始終未經允許也至度支部接直督來函言及此事之

後臣載澤卽派大清銀行監督張允言前往面詢辦法
陳夔龍告以應由大清銀行出立債票國家擔保此卽
國債票也以商辦之煤礦而出國債票一不可也國債
票而出七釐重息二不可也大清銀行而代出外洋債
票三不可也故無論煤礦有利無利度支部皆不當爲
蓋有利則當藏富於商無利又不當貽禍於國二者皆
非部臣所應出此是直督所定之第一條件實有難行
雖英人已藉此爲辭但國家擔保一層旣始終未奉

朝廷允准英人亦難妄肆要求惟有就第二條件再籌
辦法正在商酌適於十月間准直督咨度支部據灤州

煤礦總理周學熙等條陳開平收回之後歸併灤州合辦之法大致謂如將兩礦合爲一事統歸商辦由本礦股東添集資本擔任接辦則產額可酌盈劑虛價格可整齊畫一直以本礦全力補助開平確有把握若使獨立一局與灤礦並峙難免種種競爭是合之則兩益分之則兩難等語并附有三十年籌還此項收回鑄款之清單臣等以爲如此辦法果有切實抵當似尙可行除另文咨復外應請

飭下直隸總督卽行責成周學熙等迅速加籌商股五百萬兩連灤礦原有股分五百萬兩湊足商股一千萬

兩併作開灤煤礦公司卽以兩礦產業作爲抵保出立
債票分年清還英商應得之款否則如能由公司另借
輕息之款一起付還尤爲直捷此兩層應歸該公司自
行妥議呈請直隸總督酌核奏明辦理揆之各國實業
債票辦法均屬相符似亦足以取信於英人矣照此籌
款尙無流弊然後再由外務部直隸總督與英公使英
公司磋商辦理惟一面須先行派員查明英公司歷年
帳目蓋該公司現索三款一爲股票一百萬鎊一爲舊
債四十二萬鎊一爲公積三十六萬鎊共爲一百七十
八萬鎊加以三十年七釐重息計需英金五百五十二

萬餘鎊照平均金價約合銀四千四百萬兩左右爲數實屬太多必當磋商核減庶可於籌還時略輕擔負查直督咨送洋員馬尼爾末次說帖內稱開平煤礦擔負一百四十二萬鎊之七釐利息已屬甚重原定債票之數斷不能加等語又查外務部八月二十九日致直督電英使面稱風聞中國有願給一百六十萬鎊之說倘能彼此讓步擬電本國外部飭英公司通融等語是此兩數較一百七十八萬鎊原索之數已屬不同而在英人以不可必得之礦息股票換我必不能少之重息債票以誑騙始以美利終孰得孰失似不待言而可決再

查英公堂判詞所敘英公司掣發股票一百萬鎊給還華股僅有三十七萬五千鎊此外均屬紅股私相授受被人誑騙其舊債公積之數目核諸張翼此次奏摺及開送清摺內所稱并北洋譯送開平帳略其中不實不盡者頗多應於查帳時依據此數項文牘切實與之商減如有疑問張翼本係宣統元年十一月由陳夔龍奏奉

諭旨隨同辦理此案之員似不應任其置身事外仍應責成該員會商北洋辦理以上辦法如蒙

聖明裁斷以爲可行應請

飭下直隸督

臣

陳夔龍及張翼妥籌辦理再此次查辦

該礦因各處調查案據並派員考核頭緒繁多以致復
奏稍遲合併陳明所有遵查開平礦務實在情形並酌
擬辦法緣由理合詳晰具陳伏乞

皇上聖鑒訓示謹

奏

密覆開平礦案片

宣統二年十二月公會奏

度支部尙書澤

再調查卷內有御史史履晉奏稱英人見我灤礦漸有成效知唐山不能居奇急欲由我買回其心不問可知外務部何得過求速了自取喫虧我中國民窮財盡已達極點更何堪竭吾民之脂膏以飽外人之谿壑等語

宣統元年閏二月初九日奉

旨著外務部知道欽此現在直省京官會奏北洋大臣所議籌給債票實爲正當辦法其數雖鉅而取資於礦利綽有餘裕苟非調查確切何肯爲地方增茲重累等語查會摺內御史史履晉亦復列名何以本年北洋大

臣議給之數連七釐息計算不止倍於去年而直人前以爲自取喫虧者今乃以爲正當辦法蓋聞英使照會內稱按照上開一百七十八萬鎊數目每年英商所得債票利息不及十二萬五千鎊而此礦獲利卽以去年而論已有二十四萬七千鎊故前以爲竭脂膏飽外人谿壑者今以爲數雖鉅可取資於礦利也然而臣等奉查辦之

命若不將實在見聞質直言之將來該省紳商如受鉅虧臣等捫心難免欺飾查英人代辦開礦實交華商股票三十七萬五千鎊又交張翼德瑾琳股票五萬鎊又

交北洋大臣銀三十一萬兩所交者如此之少所還者如彼之多喫虧一也開平原屬近海佳礦五槽九槽煤質尤爲著名而開辦已逾三十年目下五槽將已挖空九槽亦甚稀少煤道愈挖愈深遠則成本較重煤質不佳則賣價愈薄喫虧二也開辦灤礦以逼開平未始非策但旣立意收復開平則灤礦不應大舉又糜數百萬唐山林西灤州咫尺之間三礦齊舉銷路必滯如抽停一二則虛糜更多喫虧三也直省有臨城井陘奉省有撫順本溪湖東省有博山嶧縣豫省有彰德福公司長江有萍鄉煤上海有日本煤各省紛開諸路受擠非復

從前可比識者謂開平煤利斷不能再有二三十年之
長而英人欲我包利二三十年之久喫虧四也臣等兩
月以來明查暗訪議論皆同又查前北洋大臣袁世凱
三十年二月奏稱與西人之諳法律者再四考核僉謂
收回必應償補英人所失計非六七百萬金不足抵賠
中國亦難猝籌此款等語可見當時非無收回之法惟
因鉅款難籌以致拖延時日今臣等既奏請擬照陳夔
龍所咨准歸灤州公司加招商股出立債票與英人另
議收回辦法然猶不敢不據實陳明鉅款收回喫虧之
故者誠恐英人仍復要求北洋大臣先允國家擔保之

債票直隸官紳仍復執持國家不妨擔認借此鉅款地方亦不惜增茲重累則貽害必非淺鮮況查礦務新章本有中外合辦之條直屬臨城井陘已有成案秦王島及承平永平建平等處既無關於疆土主權所有開平煤礦萬一英人知我直省紳民不惜鉅款必欲收回遂致儘力要素不能亟就範圍如此則我冒其險彼償其慾非計之得者竊以爲不妨堅持定見稍緩須臾徐籌抵制現聞該礦票價已跌在中外之明白礦務者皆謂相持數載其煤必滯其利必薄其股票價必大落屆時將其股票盡行收買或陸續收買過半如一百萬鎊之

股票至多不過一百萬鎊之價值全盤歸我免致受此數千萬鉅虧實爲計之最善者也或又謂北洋大臣已允給鉅數國家擔保之債票未便失信於外人查本年九月二十九日英使照會外務部內稱直督在倫敦開議滿望商量日有起色乃偶閱

上諭所派之大員並無全權實屬常有之葛藤是以在倫敦代直督所擬之策發出中國政府債票贖回該公司未經政府允准若果如此諒不如停止商議仍然照舊辦理等語可見未曾奉

旨允准之事彼亦不能強我所難惟仍然照舊辦理一

語必須由外務部將英公司在我國內違背我國法律辦理此項要緊事業我政府既始終未經承認卽英公堂前斷亦定爲詐騙可見并爲外國法律公理所不容斷不能因此次北洋派員赴倫敦商議卽可承認張翼所不認德權琳私立之賣約所以照舊辦理一層萬難承認等情向英公使切實駁復應請

飭下外務部及北洋大臣一併堅持不可鬆懈至或謂開平不收回欒礦恐爲所阻此論尤妄北洋大臣從前原奏開平礦界僅有十里當日林西續開礦井北洋大臣特又奏准而後行就使英人受有張翼之副約亦豈

能越乎開平原有之權限此固歷任北洋大臣所拒而
未許者其移交約內各地名祇因開平局曾在該處買
有民地數畝而言並非所列地名皆准開礦況該地畝
至今並未稅契亦未在地方官衙門過割是以開平洋
人在彼打鑽卽已禁阻而周學熙等稟請開辦則已奏
准此斷非開平所能過問至屢次參案所稱擅賣疆土
等語業經查明實無其事英公司雖狡固無所用其譁
張凡此皆無待鯁鯁過慮者也理合縷晰密陳伏祈

聖鑒謹

奏

再密覆開平礦案片

宣統二年十二月
擇公會奏

度支部尙書

再本年九月二十六日承准軍機大臣封交直隸總督
陳夔龍一摺奉

硃批著將此摺封交載澤盛宣懷閱看一併確查具奏
欽此查原摺內稱據洋員近由倫敦稟稱張翼曾派律
師向英公司索取賠償三十萬鎊並在英外部陳請此
項賠償未經清付以前公司不得移交產業比向英外
部查詢實有其事因檢查全卷張翼當光緒二十六年
冬間卽有胡華私函允給五萬鎊與德璀琳平分之語
遂於次年正月簽訂副約移交約迨至赴英涉訟除責

認副約之外並索賠償箇人損失二百萬元回華後復與英公司經理那森增索公私賠償三百萬元卷宗具在歷歷可憑等語臣等查核直隸總督咨送開平礦務卷內此數事皆已有案當卽據以咨查張翼茲據張翼復稱所索賠款係英公司應出之賠償公私各款皆在其內所指三十萬鎊乃英人模略之詞並非成議本年六月電致在英律師鶴士釐查詢此款並屬通告英外部三次去電皆陳督所知前呈英公堂索賠帳單共約需五六十萬鎊現在又隔數年除在英所用訟費應俟結案再計外所有

國家釐稅項下除交商部十萬兩外尙欠八萬餘兩報
効項下五十餘萬兩舊員司花紅項下六十四萬餘兩
舊股友餘利項下二百五十八萬餘兩又二十七年舊
股友應得而未派之股利十八萬餘兩暨墊辦唐山巡
警費開平局員司薪水丁役工食並翼因此案損失之
款非查據帳目秉公核算不能遽定然計不止三十萬
鎊之數以上所開已可概見至賠償未清不得移交產
業之語尤爲無此情理翼已由北洋撤去督辦何能有
不准移交產業之權力又胡華所交之開平新股五萬
鎊一節當時原擬不收因德璀琳言可爲墨林詐騙證

據業由伊手付給收條並在駐津英領事處聲明有案
二十八年翼回奏御史王祖同參摺二十九年函復前
北洋大臣袁飭繳五萬鎊照會並經陳明在案此項股
票本存德璀琳處嗣翼赴英控告律師鶴士釐以涉訟
需款向德璀琳取出四萬鎊暫由銀行抵用後因英公
司賠款未繳由翼回華後在大清銀行押銀四十五萬
兩歸還前欠現四萬鎊股票存大清銀行一萬鎊暫歸
德璀琳墊款均屬有帳可稽并將鶴士釐往來電報所
向英公堂索賠華洋文帳單前北洋大臣袁札件及與
德璀琳往來函稿等件附鈔聲復前來臣等核其情節

原摺所稱張翼向英公司索取賠償三十萬鎊既無其詞自不能指此以爲肥私之據惟索賠之公私款目非與各處及英公司核對帳目不能知其是否確實應俟派員查帳時一并查明再行核辦至紅股五萬股既據於光緒二十八九年將緣由奏明

朝廷函復北洋現在又已分別抵押還墊此係大眾皆知之事將來結案時應由張翼核實具報惟按照張翼所呈英公堂帳單英公司應償中國之款爲數甚多前議中外合辦尙可云款在公司之內不必計較今議收回應予者皆予之則舊日照帳積存之款積存之煤以

及中國老股應得光緒二十六年以前之公積餘利應抵補者亦應索其抵補如德瑾琳私立賣約中所列各欠據張翼查復其不符之數亦不下數十萬兩如果英公司代還舊欠均於此次所列之舊債四十二萬鎊內撥還則於議還舊債之時亦可藉茲商減此皆可於籌辦此案之時仍令張翼詳細查核不必令其置身事外抑臣等尙有不能已於言者此案張翼當庚子兵亂之時委託德瑾琳保全礦產事出權宜原非過舉卽德瑾琳與胡華私立賣約張翼不認英公堂亦許其不認可無疑義惟辛丑正月回津後不認賣約而認移交約張

翼之意加立副約則移交二字不過變華商獨辦爲華洋商合辦而已然合辦二字雖奏明有案控英公堂有案而卒不能實行無阻貽誤至今爲人口實此則難爲該員解免者此次該員摺內所陳辦法一謂副約可行一謂判詞可據如英公司不服尙可赴英上控原屬理直氣壯但上控卽能得直亦祇能照前判照副約爭至中外合辦而止今直人旣決議收回何如就灤州煤礦公司所擬之辦法由北洋大臣督飭該公司自行籌款收回使兩礦相厄者轉而爲一氣相生惟北洋大臣旣照英公司所索之價允給一百四十二萬鎊而中國所

收者僅老股三十七萬五千鎊豈移交如許之產業而
所值僅止此數乎則張翼所訂中外合辦之約章及英
公堂之判斷皆可爲查帳算帳之根據亦未嘗不可備
北洋之採擇但使中國多得一分磋磨卽少受一分虧
損此則臣等查明此案之實情及復陳辦法之微意也
所有遵

旨查復緣由合再附片密陳伏乞

聖鑒謹

奏

查覆開平礦案片

宣統二年十二月公會奏

度支部尙書澤

再^臣等正在具摺復於十一月二十六日承准軍機處鈔交直隸總督陳夔龍片奏一件奉

硃批著交載澤盛宣懷一併查核具奏欽此查原片內稱開平鑛案未結現該公司頗有變動產業情事如胥各莊一帶林木原爲鑛道要需近竟採伐出售又井下材料漸行提出應擴工程亦多停止且鑛廠西南平地塌陷是其攘利貽害已露端倪此種情形當新舊交替之際本在意計之中是以^臣原定條件特先聲明所有該鑛一切財產悉以該公司最後年總結帳之日爲斷

七月間交涉將可就緒當即奏請

飭部預籌接收辦法皆爲杜此流弊起見嗣後張翼飾詞朦奏停議數月致予外人以可乘之機現如早定接收辦法或尙可以挽救若再遷延不決則全鑛產業變更尤甚雖

國家以疆土主權爲重不計利益之厚薄然債票本息取資鑛利原定規畫誠恐難副初心與其貽累將來不如早爲之計或竟撤銷條件由部另議辦法等語臣等查該鑛一切財產既經直隸督臣原定條件與之聲明

悉以該公司最後年總結帳之日爲斷似此鉅款交割

如果產業或有變更皆可與該公司理論並可於付款內扣除似不能聽該公司任意毀壞況變動產業或在議准給價而尚未交收之日今未議准而彼卽毀傷似無此理至此項接收之法總須先有接收之處方能定見督臣前奏雖請

飭部預籌接收辦法然收價既未奉

旨由部給付此鑛亦非部臣所應收辦則接收之法亦難由部預爲擬議此鑛原本爲北洋官督商辦之業則收回後自當照前辦理方爲正當斷無由部接收之理此次臣等所擬就灤州煤鑛公司所籌開灤合辦之法

長列不彙 卷十五
由督臣督飭籌辦一節如蒙

俞允則一面與該公司議價一面即可就近籌備接收亦尚不難挽救且如此辦法與督臣原定第二條件不甚懸殊至於所擬能否辦到條件應否撤銷奉

旨後皆應由督臣酌度辦理惟收回之法臣等以為前

約既非

國家承認則現時所給之價祇能作為收買實在洋股及貼補英公司經理此鑛歷年損失之用不能作為收回主權疆土之賠償臣等正摺內已將此層反覆證明無煩再計此項付價既專為貼補公司之用則公司所

有之帳目所有之產業自不能不於議價時一一清查
然後再行給值斷不能索價則任其爭多交產則任其
損少是該公司攘利貽害一層亦似可毋庸深慮所有
遵

旨查核緣由理合附片具陳伏乞

聖鑒謹

奏

愚齋存稿卷第十五